

壽光縣誌
(民國)
四

壽光縣志卷十二

列女傳

周

紀叔姬魯隱公之妹與姊伯姬先後歸於紀侯伯姬卒於魯莊公四年三月在紀侯大去其國之時死於憂患可知紀亡叔姬無依從紀季入齊以鄫有紀廟莊公十二年三月歸於鄫二十九年十二月紀叔姬卒

楊于廷曰叔姬守義擬迹共姜春秋於其始則書歸紀於其繼則書歸鄫於其終則書卒書葬意深遠矣

壽光縣志（民國）

南北朝 北齊

王雲妻崔氏清河人學識有風訓生九子並風流蘊藉世號王氏
九龍听晞尤知名

宋

張廷榮妻王氏廷榮爲宣和間進士值擾亂與父爲流賊邢眞所
執拷掠索金時氏已避匿他所聞痛楚聲急持金往贖賊見氏美
乃舍廷榮父子而劫逼之氏怒罵不止遂被殺時年二十詔旌其
門祠墓在城南郭外至清初舊碑猶存

邑人趙懿訓曰康熙戊寅四月余偕同人輩將有事於城南友

人之園亭路經三里莊前道左有土邱微存其旁斷碑仆蔓草
中因相與摩挲辨之已剝蝕不可盡讀尙能十得其七八則烈
婦王氏祠碑也碑爲元代壽光縣尹李惟彥撰文言王氏贖舅
全節之事甚烈兼引歐陽公五代史所載李氏斷臂事爲比且
言經累代變遷之後其祠墓尙存而傾陔不治伊蒞任之始卽
與邑隱士許孟謙修葺之而誌於石於時致有異蛇之祥焉嗟
乎吾邑乘傳列女舊以烈顯者元明以前祇得王氏一人耳自
宣和以逮惟彥撰文之時已經二百餘載尙葺其祠墓而俎豆
之意當日之行事必有大表著於人耳目間者乃自惟彥以迄

今日又四百載矣復令人於荒郊禾黍中拂拭遺碣遙想其貞筠皎日之操是可慨也因附志其事以資來者之參考焉

元

郭春妻李氏夫亡遭亂完節不辱延祐五年旌

仵氏邑人張某之妻年十七而寡竭力以養舅姑生事死葬具有禮法有司上其事於朝被旌

掌谷稅妻劉氏夫亡不嫁撫孤成立有司區其門以事上聞特加旌表

朱行義妻赫氏夫疾篤語令別適氏泣曰妾幸有子當鞠育教誨

以繼宗祀夫死果不食言有司聞於朝被旌

徐進妻田氏元季擾亂避兵於瑯琊西山舅與夫皆不幸氏扶姑攜子負二遺骸歸瘞其先壟姑終復以禮葬之里人嘉其節行具實上聞得旌焉

明

蔣某妻毛氏正統壬戌從夫行役戍蓮水城夫卒攜幼子二負骸骨艱辛萬里歸葬故鄉始終全節閭里高之正統七年旌

張瓚妻牟氏性至孝瓚早卒天順初歲饑貧不能支親屬風以改適牟正色拒之守節終身

季

二

二

卷十二 列女傳

三

一

張範妻隋氏正德六年流賊入邑境氏潛身草堆中賊搜得之見氏少艾欲相逼不從賊怒斷其左臂氏罵愈力乃共刃之一賊歎曰此烈婦也不可暴露爲瘞其尸而去

岳情妻崔氏情十八歲死氏伏尸痛哭水漿不入口曰夫既死矣我何生爲卽闔門以帶縊於梁上

張半廂張祿之女饒有姿色年十八未適人流賊犯境搜得之半廂曰吾良家女寧死不從賊因罵不絕口賊怒殺之

劉鈞繼室董恭人隰州知州瑜女文和公珣家婦也事翁姑待前室女嘖有賢婦聲夫弟鑑夫婦皆早卒遺一女六歲一男甫三月

恭人躬親撫育俾忘其爲孤人愈稱其賢性溫恭好施予卒之日
劉氏無男女哀痛如喪妣子二澄甫淵甫

樂安李愚谷

舜臣

董恭人行狀

董恭人者故中憲大夫漢陽知府壽光劉公之配也大夫先娶
王宜人早卒繼娶董恭人恭人之先亦壽光人自其祖諮始授
內黃教諭歷陞代王府長史既老居內黃其後遂爲內黃人諮
生隰州知州瑜瑜娶某氏生恭人大夫之父實文和相公知州
君夙負奇氣與文和公爲布衣交文和故重知州爲人王宜人
之卒也適恭人隨知州君在邸文和公遂爲大夫繼娶恭人恭

人兼才備懿馬太夫人甚嘉愛之太夫人于大夫爲繼母恭人
已得其心王宜人遺一女甫五歲文和公及太夫人莫不疚于
心也見恭人篤愛若己出則又甚慰及長適青州衛指揮使高
晁恭人少涉書史暇日圖史自娛于女紅亦不廢也至躬操刀
匕太夫人食飲非自爲之不以進也文和公被讒歸青州乃居
陽河舊廬陽河去府第五十里恭人必自爲餅餌膾炙遺騎饋
獻日常不乏吾過陽河陽河一老父爲吾談是是足爲孝矣大
夫弟鑑者及配許氏皆早卒遺一女六歲一男甫三月耳皆屬
恭人親撫養之大夫官京師十五六年往來數千里而二孤者

未嘗不在側也女長適濟寧陳策策後知彰德府以是封安人
男長名漣甫爲娶知縣申宜女漣甫又短命死恭人哭曰是何
不幸爾父母皆早死吾盡吾心庶幾爾父嗣續不至乏絕乃今
爾亦死耶于是益親申氏申氏無子女寡居今三十年矣嗟呼
孤寡者生人之至戚也恭人惻然不忍於二孤也又成申氏之
志使聞于邦族而可垂之簡冊卽漣甫親大夫子卽恭人所自
出所以厚申氏者不逾此矣吾是以嘆恭人之賢嘗聞先王之
世教化人者非必盡在君師蓋君以令乎其臣而臣自以儀于
其家也是故有以漸之易入也有以造之易及也故大小相孚

所以爲仁遠近相聞所以爲風若申氏豈非恭人卒成乎大夫
都察院時弟銳者卽今太常寺卿西橋先生亦以文和公蔭及
某某俱爲中書舍人是時兄弟四人同舍共饗恭人以長獨當
內務而能經紀其間大夫性友愛恭人輒當其心大夫素嚴毅
恭人濟以寬僮僕且人人遂矣恭人篤厚夫族見族眷尊屬者
下之尤好恩施常恤其嫠老而濟其所不足者其視解簪珥若
捐芥也視富貴未嘗有也卒之日劉氏無男女莫不攀號若親
妣者足爲賢矣大夫諱鈞字南金以蔭補太學生授禮部司務
歷知漢陽府其可傳者俱載濮陽李蒲汀公高陵呂涇野公所

著碑辭大夫之卒也恭人年已六旬矣猶蔬食三年究以毀瘁致疾乃嘉靖壬辰五月五日終於正寢距生天順壬午享年七十有一生男二長澄甫正德戊辰進士累官監察御史山西參議次淵甫庚午舉人始恭人以大夫郎中時封宜人繼以澄甫爲御史加封恭人茲澄甫將舉恭人之柩啓大夫壙而合葬焉吾恐恭人之德不傳於人輒次所爲以俟採擇夫青州古文教之邦晉以來多值戎虜之亂所謂文教者漸湮沒不可復有至於今日稱名族世家者始見劉氏劉氏承文和公愈益昌大然其人往往有可觀矣或曰大夫實宗子也大夫能收其族斯恭

人之相於夫子而宜其家者不亦可見哉

見愚谷集

王正明妻邱氏正明爲唐縣丞卒氏與妾陳同心守義五十餘年游公子妻岳氏游早卒遺孤在抱隻影無依其父母憐之諭以他適氏誓死不從後被旌

靈石知縣劉穎妻游氏少司空學易之母幼誦女誡通經史穎歿後氏守節五十年爲學易講解書義學易始歲試不利有愠色氏曰汝不勤誦讀文必不佳考居下固宜何愠爲答曰但不憶論題耳氏問何題曰甘陳功罪氏曰此出前漢書爲言甘延壽陳湯平

郅支事甚悉

鄭烈女幼許字於楊三偉三偉卒欲見其姑母遣人邀姑至女抱持痛哭欲隨姑往皆止之家人送姑出門移時歸女已自縊

邑人安致遠鄭烈女傳

烈女名八姐爲壽光之東宅科人父名鄭香遠女生而明慧端方不苟言笑自週歲時卽許字於楊應聘之子三偉爲妻應聘早亡三偉與孀母煢煢相依生計轉窘女與三偉同歲生年皆十六歲議婚有日矣而三偉不幸以疾殞女聞之卽取孀家結褵一綾帨繫臂上晝夜痛哭以死自誓母防護甚嚴不得死乃好語謂其母曰阿母但許兒往楊郎柩前一奠以伸十六年許

字之情兒亦可以不死母知其意欲畢命於夫家不聽往女又好語謂其母曰婦所以奉舅姑也舅與楊郎已矣尙有其寡母在得吾姑至一見稍語家常兒從此亦可以不死母遣人邀其姑至卽抱持痛哭絕而復甦曰姑年老夫與子皆亡孤身何所依倚兒將隨姑往紡績以供婦職庶可以慰楊郎於地下母與姑皆不聽其往母送姑出門語絮絮家人皆隨兩嫗聽話款曲移時歸女闔寢扉自縊絕矣顏色如生其衣皆重縫紉結不可解事在明萬歷十四年八月十五日三偉死於七月十五日縣令高節表其門易名爲玉英云

郝應璧妻王氏應璧遘疾氏誓以身殉見夫疾革遂先自縊後蒙旌益賜其子衣巾爲奉祀生

陝西道副使李時漸妻劉氏時漸寢疾氏不解髻不交睫者八日夜比屬續仰天號泣以死自誓斷七之夕自經於柩側

李永健妻韓氏孝行純篤姑有痼疾奉湯藥二十餘年不懈姑歿事翁尤慎縣令商邱王杼嘉其行請旌表如例

隋氏李謹聘室謹爲江西南康府推官不伐季子氏爲陝西平涼府知府不矜長女兩家皆名宦氏自幼知書重節義崇禎元年三月謹疾卒氏聞耗詣夫家大哭哭已乘家人不及防縊死柩側時